

Exitoso celebracion di Purple Day



ORANJESTAD - Siman pasa 26 di maart Stichting Epilepsie Aruba (SEA) a celebra pa di prome biaha e dia internacional di epilepsia, esta PURPLE DAY. E meta di e dia aki ta pa conscientisa mundo cu ora un hende tin epilepsia, esey no ta fin di mundo pe y cu comunidad mester dun'e e sosten necesario. Nos fundacion ta hopi contento cu e celebracion a bay sumamente bon. Na Colegio Arubano y na Hospital miembronan di Directiva tawata presente pa duna informacion riba epilepsia. A parti casi 1000 cinta biña cu ta e color di e organizacion internacional di epilepsia y tambe hopi folder di

SEA mes.

Loke a resalta ta e falta enorme di informacion riba epilepsia. Tin un necesidad grandi pa sa kico e malesa aki ta, con mester trat'e y si un pashent cu epilepsia por funciona normal den comunidad. Y hustamente p'esey SEA a wordo lanta y riba un base regular ta duna lectura riba e tereno aki na scolnan, organisacionnan social y tambe na comunidad en general pa medio di anochinan di informacion.

SEA a wordo funda na 2007 y prome cu esey pa basta aña un pareha Mericano tawata bin Aruba tur aña y duna informacion riba epilepsia en-

tre otro na TeleAruba. Ta trata di Martin y Marcia Brait cu realmente a inspira un paar di hende pa lanta SEA. Y pa casualidad nan tawata na Aruba dia 26 di maart y nan a bin cuminda e miembronan di Directiva di SEA na Hospital. Nan a keda hopi contento di mira cu SEA ta activo riba e tereno di epilepsia cu ta hopi importante pa nos comunidad. Esnan cu ta sufri di epilepsia merece atencion y sosten di nos tur. Riba e combinacion di foto por mira miembronan di Stichting Epilepsie Aruba durante varios di nan actividadnan tanto na Colegio Arubano y na Hospital durante Purple Day. □